

«Schliar ensemen la situaziun dals fugitivs»

Alloschament da requirents d'asil è stà tema tar l'ura da dumondas

■ (anr/fa) La probabilitad dad in'unda da fugitivs eren il Grischun occupa deputads al cussegl grond. Sustegna il chantun las vischnancas en cas d'ina da questas undas?, è stada ina da las dumondas. «Co sa preschenta la situaziun areguard la controlla dals documents persunals dals fugitivs che arrivin en Grischun, e tgi fa las controllas e surprena ils custs?», ha dumandà *Kenneth Danuser* (pbd, Tusaun) mesemna la regenza. Cussegliaer guvernativ *Christian Rathgeb* ha respundì che la gronda part dals requirents d'asil n'haja nagins documents persunals tar els cur ch'els fetschian la dumonda d'asil. «Quai s'ha midà l'ultim temp mo tar las persunas che pon far quint da pudair restar, p. ex. quella da la Siria.» Documents ch'èn avant maun tegna il Secretariat statal per migraziun en salv. Ils chantuns n'hajan en quel connex naginas leziyas e cumpetenzas, ha ditg il president da la regenza.

Uschiglio dentant dovri documents valaivels

Ordaifer dal sector d'asil, p. ex. tar ina permissiun da dimora per motivs umanitaris, pretenda l'Uffizi per migraziun e dretg civil grischun (UMC) in document da viadi valaivel. Quels vegnan surdads a la polizia chantunala. «Senza in tal document vegn l'entrada per regla refusada; quai è entant enconuscent, dapi passa in onn n'è vegnì inoltrà pli naging pass falsifitgà.» Ils uffizis dal stadi civil registreschan persunas estras mo sche quella maridan, sch'i nascha in uffant etc. En quels muments vegn controllada l'identitad er a maun dals documents da viadi. «Ils custs per las controllas da vart



Sch'il chantun Grischun vegn a duvrar dapli centers per requirents d'asil u betg nun è anc enconuscent.

KEYSTONE

da la polizia chantunala surprena l'UMC.»

«Dependent dal svilup da la migraziun vers l'Europa»

Beath Nay (pps, Cuira) ha dumandà sche la regenza saja er da l'avis che la populaziun da Cuira vegnia strapatschada memia ferm sch'ella haja da dar suttetg ad ulteriurs 1500 requirents d'asil. «La regenza ha preni conuschientscha che la

ciudad da Cuira è pronta da dar, per il cas da bleras dumondas d'asil, alloschi ad ulteriuras persunas», ha respus Rathgeb, «sche quai daventa necessari vesan ins però pir ils proxims mais observond il svilup da la migraziun vers nord.» Il chantun e la confederaziun s'hajan preparads per in augment da dumondas d'asil, ha'l cuntinuà, «uschè ditg sco pussaivel vegnin nus a lavurar cun las structures odiernas chantunalas e decentralas.»

Sch'il chantun Grischun nun avess dad esser pli capabel da dar sez suttetg als requirents d'asil, alura vegn il chantun, sco ch'il cussegliaer guvernativ ha punctuà, a sustegnair las vischnancas pli bain pussaivel. Las pauschalas per dar asil che la confederaziun paja als chantuns vegnissan, sco ch'el ha menziunà, transferidas a las vischnancas, tenor il dumber da requirents d'asil che quella surprendessan. «Igl è pussaivel da dumagnar questa lezia

difficila mo ensemen, cun ans sustegnair vicendaivlamain», ha accentuà il president da la regenza *Christian Rathgeb*.

Acziun da l'IOF duai tegnair quai ch'ella empermetta

«Betg reussì da far l'examen per il gimnasi? Perquai na va betg sut il mund.» Cun quest messadi tschertga, sco che *Roman Hug* (pps, Tschintg Vitgs) ha constatà, l'Institut Otalpin a Ftan (IOF) giu la Svizra bassa novas scolaras e scolars. Cussegliaer guvernativ *Martin Jäger* l'ha ditg ch'il chantun na savevia nagut da quest'acziun da propaganda da l'IOF, che represchentants da l'Uffizi per furmaziun mediasuperiura sajan vegnids infurmads en chausa pir ils 7 d'avrigl da *Jon Peer*, il president dal cussegl administrativ da la scola media en Engiadina Bassa. A l'avis da Jäger èn da questas acziuns giustifitgablas, fintant ch'ellas nun empermettian dapli che quai ch'ellas tegnian. «Causa il regress da naschientschas è daventada la situaziun difficila per tut las scolas medias en Grischun, perquai ha il cussegl grond l'onn passà decis pli grondas contribuziuns finanzialas per las scolas medias privatas», ha menziunà il cussegliaer guvernativ, «e quels imports vegnan uss utilisads per acquirir scolaras e scolars en auters chantuns ed era en auters pajais.»